

PRÓFREGLUGERÐ

fyrir skipstjórnarnám.

I. KAFLI

Almenn ákvæði.

1. gr.

Í skólum sem kenna til skipstjórnarréttinda skal vera samræmi um námsáfangana, kennslu og próf allra stiga skipstjórnarnáms.

Til þess að sjá um slíkt samræmi skal menntamálaráðuneytið skipa 3ja manna nefnd. Í nefndina skal skipa fulltrúa frá menntamálaráðuneytinu, Siglingamálastofnun ríkisins og Stýrimannaskólanum í Reykjavík.

2. gr.

Próf skulu að jafnaði haldin í hverri kennslugrein að loknum hverjum námsáfangana, hvort heldur er á haustönn eða vorönn. Til að gangast undir skipstjórnarpróf verður nemandi að hafa setið í skóla. Þó er heimilt að sækja um leyfi til að ganga undir próf án þess að hafa stundað nám við skóla, ef sérstakar ástæður mæla með því. Slíka beiðni skal senda menntamálaráðuneytinu minnst tveimur mánuðum fyrir próf og skulu beiðninni fylgja vottorð um að fullnægt sé inntökuskilyrðum þess stigs skipstjórnarnáms, sem hann þreytir próf í.

3. gr.

Við lokapróf einstakra áfanga skipstjórnarnáms skipar menntamálaráðuneytið prófdómara að fengnum tillögum skólameistara/-stjóra. Kennarar skólans skulu einir sjá um próf önnur en lokapróf.

Heimilt er að kveðja til tvo prófdómara í sama prófi, ef um sérstök tilvik er að ræða. Prófdómarar skulu samþykkja verkefni lokaprófa. Minnst tveimur vikum áður en próf hefjast skal samin próftafla og fest upp þar sem próftakar hafa aðgang að henni. Próftakar skulu mæta stundvíslega í próf eftir þessari töflu.

II. KAFLI

Próf og námsmat.

4. gr.

Próf fara fram skv. þessari prófreglugerð sem birta skal í námsvísi skólans. Áður en próf hefjast skal skólameistari ganga úr skugga um að próftakar hafi kynnt sér prófreglugerðina. Brot á prófreglugerð getur varðað brottvísun frá prófi.

Í erlendum tungumálum skal prófað bæði munnlega og skriflega, þó er heimilt að fella niður munnleg próf sé ekki um lokaáfangana til skipstjórnarstigs að ræða.

5. gr.

Nemandi sem mætir ekki til prófs eða gengur frá prófi og kennir sjúkleika um, skal sanna með læknisvottorði að hann hafi verið sjúkur, og má þá prófa hann í því sem hann átti ótekið próf í, þegar því verður við komið.

6. gr.

Einkunnir skal gefa í heilum tölum frá 1 til 10 og skal hafa eftirfarandi til hliðsjónar um merkingu þeirra:

10 u.þ.b. 95–100% markmiða náð	5 u.þ.b. 45– 54% markmiða náð
9 u.þ.b. 85– 94% markmiða náð	4 u.þ.b. 35– 44% markmiða náð
8 u.þ.b. 75– 84% markmiða náð	3 u.þ.b. 25– 34% markmiða náð
7 u.þ.b. 65– 74% markmiða náð	2 u.þ.b. 15– 24% markmiða náð
6 u.þ.b. 55– 64% markmiða náð	1 u.þ.b. 0– 14% markmiða náð

Að lokinni hverri námsönn gefur kennari nemanda einkunn fyrir frammistöðu og kunnáttu. Nemandi skal hafa skilað öllum tilskildum heimaverkefnum áður en kennslu lýkur.

Kennaraeinkunnir skulu birtar áður en próf hefjast.

Áfangaeinkunn er meðaltal kennaraeinkunnar og prófseinkunnar.

Kennari og prófdómari skulu sameiginlega ganga frá lokaeinkunn í hverri grein og færa einkunnir á einkunnablað, sem er undirritað af þeim báðum og dagsett.

Verði meðaltal á miðju bili einkunnastigans skal valin sú einkunn sem nær er prófs-einkunn nemanda.

Til að standast próf í áfanga og fá leyfi til að hefja nám í eftirfarandi áfanga þarf lágmarkseinkunn 5. Þó er nemanda heimilt að útskrifast með einkunnina 4 ef um lokaáfanga eða stakan áfanga er að ræða. Í siglingareglum skal hafa einkunnina 6. Í siglingafræði, ratsjárútsetningum og stöðugleika skal samtala einkunna eigi vera lægri en 18 og engin einstök einkunn vera lægri en 5. Í siglinga- og fiskileitartækjum, verklegri sjóvinnu, íslensku og ensku skal lágmarkseinkunn vera 5.

Engin prófseinkunn má vera lægri en 4.

Birting einkunna er heimil strax að lokinni prófdæmingu.

7. gr.

Nemandi sem ekki nær tilskildum lágmarkseinkunnum á annaprófi hefur heimild til að endurtaka próf í þeim áföngum.

Endurtökupróf skal ekki halda fyrir en öllum annarprófum er lokið og áður en næsta önn hefst og skal líða minnst ein vika frá síðasta prófi.

Nái nemandi ekki tilskilinni lágmarkseinkunn á endurtökuprófi hefur hann heimild til að þreyta aftur próf, þegar þau verða næst haldin.

Nemanda er heimilt að þreyta próf þrívegis í sama áfanga.

Nemandi sem æskir endurtökuprófs skal skrá sig í prófið með minnst viku fyrirvara.

8. gr.

Brottfararskírteini.

Eftirfarandi upplýsingar skulu vera á öllum prófskírteinum:

Nafn skóla og heimilisfang.

Nafn nemanda.

Kennitala.

Námsstig.

Nafn námsgreina og áfanganúmer.

Einkunnir allra námsáfanga.

Skólasóknareinkunn eða vitnisburður um ástundun.

Heildareiningafjöldi hvernar greinar.

Einingar alls.

Dagsetning skírteinis.

Undirskrift skólameistara/-stjóra.

Stimpill skóla.

Allar upplýsingar skulu vera á sama blaði (opna) og nafn skóla, undirskrift skólameistara/-stjóra og stimpill skóla. Nemandi fær ekki prófskírteini nema hann hafi lokið tilskildum námskeiðum, sem haldin eru á vegum skólans og nemendum er skylt að sækja og skal það skráð í prófskírteini. Prófskírteini skulu gefin út bæði á íslensku og ensku.

9. gr.

Nöfn þeirra er ganga undir próf skal rita í sérstaka bók, sem menntamálaráðuneytið löggildir og geymd er í viðkomandi skóla. Í prófbók skal skrá fullt nafn hvers nemanda, kennitölu og fæðingarstað ásamt einkunnum, sem gefnar voru við prófið. Nafn þeirra sem ljúka prófi skal einnig varðveita í spjaldskrá eða tölvu. Skólameistari/-stjóri sér um skráningu einkunna í prófbók.

Prófbók skal undirrituð af skólameistara/-stjóra, kennurum og prófdómurum.

10. gr.

Reglugerð þessi sem sett er samkvæmt lögum nr. 22/1972 og reglugerð nr. 174 um Stýrimannaskólann í Reykjavík og lögum nr. 57/1988 og reglugerð nr. 105/1990 um framhaldsskóla og öðlast gildi 1. sept. 1991.

Jafnframt er felld úr gildi prófreglugerð fyrir Stýrimannaskólann í Reykjavík nr. 481 frá 18. nóvember 1986.

Menntamálaráðuneytið, 15. mars 1991.

Svavar Gestsson.

Sólrún Jensdóttir.

AUGLÝSING

um staðfestingu á breytingu á deiliskipulagi við Bauganes nr. 4 og 6, staðgreinireit 1.671.2 í Reykjavík.

Samkvæmt ósk borgarstjórnar Reykjavíkur hefur skipulagsstjórn ríkisins hinn 6. febrúar 1991, fallist á og staðfest, sbr. 3. mgr. 19. gr. skipulagslaga nr. 19/1964, þá breytingu á áður staðfestu deiliskipulagi á lóðunum nr. 4 og 6 við Bauganes, staðgreinireit 1.671.2 að lóðin nr. 4 stækkar um 115 fermetra og lóðin nr. 6 minnkar sem því munar.

Borgarsjóður Reykjavíkur tekur að sér að bæta það tjón sem einstakir aðilar kunna að verða fyrir við breytinguna.

Umhverfissráðuneytið, 15. apríl 1991.

F. h. r.
Páll Líndal.

Hólmfríður Snæbjörnsdóttir.